

Vedtekter

for gravplassane på Osterøy



DEN NORSKE KYRKJA
Osterøy kyrkjeleg fellesråd



DEN NORSKE KYRKJA

Osterøy kyrkjeleg fellesråd

VEDTEKTER FOR GRAVPLASSANE I OSTERØY KOMMUNE (FORSKRIFT)

Jf. lov av 7.juni 1996 nr. 32 om gravplassar, kremasjon og gravferd (gravferdslova) § 21 (1)

Vedtatt av Osterøy kyrkjelege fellesråd (05.11.2019)

Godkjent av Bjørgvin bispedømmeråd

I kraft frå 01.01.2020.

§ 1 FORVALTNING

Gravplassane i Osterøy kommune er underlagt Osterøy kyrkjeleg fellesråd sitt administrasjons- og myndigheitsområde.

§ 2. DEFINISJONER

Fri grav: Grav som gravplassforvaltinga har tildelt ein avdød person frå kommunen, og som det ikkje blir betalt festeavgift for i fredingstida.

Festa grav: Grav som blir festa mot betaling av avgift.

Festa gravstad: Inntil 3 kistegraver som er festa saman.

Urnegrav: Grav til askeurne med plass til fire urner, jf. gravferdsforskrifta § 14. Dette gjeld ikkje § 11 Namna minnelund, kor det med urnegrav blir sikta til grav med plass til éi urne.

Kistegrav: Grav som stettar forskrifta sine krav til storleik for gravlegging av kister. I ei kistegrav kan det og gravleggjast urner.

Fredingstid: Tidsrom frå siste gravlegging til grava kan takast i bruk igjen til ny gravlegging.

Festetid: Tida det er avtalt å feste ei grav for.

Ansvarleg for grav: Den som er ansvarleg for ei fri grav.

Festar: Den som står som part i ein festeavtale.

Anonym minnelund: Gravfelt for anonyme graver. Feltet kan ha eit felles minnesmerke utan opplysningar om kven som er gravlagt.

Namna minnelund: Gravfelt med felles minnesmerke med namn og data på dei som er gravlagde der. (Ikkje etablert på Osterøy enno.)

§ 3. FERDSEL PÅ GRAVPLASSANE

Besøkande skal om mogeleg ferdast gåande, jf. gravferdsforskrifta § 9 (2).

Gravplassforvaltinga kan etter søknad gi løyve til å køyre ved dokumentert sjukdom/rørslehemming. All køyring skal skje særleg omsynsfullt.

§ 4. VAL AV GRAVPLASS

Avdøde personar i kommunen kan gravleggjast på den av gravplassane ein ønskjer i kommunen.

Dei har rett til fri grav så langt grava blir tilvist.

Avdøde personar, som på grunn av sjukdom eller alderdom har budd i ein annan kommune mot slutten av livet, blir medrekna på same måte som kommunens eigne innbyggjarar, og har rett til fri grav så langt grava blir tilvist.

Avdøde personar frå andre kommunar kan bli gravlagt i kommunen mot at kostnadane ved gravferda og avgift som ved feste av grav blir betalt.

§ 5. FREDINGSTID

Fredingstid for kistegraver er 30 år på eldre felt og 20 år på nye felt. Sjå liste.

Fredingstid for urnegraver er 20 år.

Gravplassforvaltinga kan gjere vedtak om lengre fredingstid for enkelte graver/gravfelt.

Liste over gravfelt av nyare dato, med fredingstid 20 år for kister:

- Bruvik kyrkjegard – Felt G11
- Eidsvika gravplass – Felt A
- Gjerstad kyrkjegard – G10 og G11
- Hamre kyrkegard – G10, G11, G12 og G13
- Hosanger kyrkjegard – Felt O
- Mjøs gravplass – Felt A, B, C, D, E og F

§ 6. FESTE AV GRAV

Når kistegrav skal takast i bruk kan ein feste (halda av) ei grav ved sida av. Ein kan og søkje om få halda av ei ekstra grav om behovet tilseier det. Desse gravene utgjer då ein gravstad.

Ved bruk av urnegrav kan det ikkje bli festa ei grav ved sida av.

Når ein festar (held av) grav ved sida av den kistegrava som blir tatt i bruk, må det betalast ein eingongssum for reservasjonen. Ein festar då begge gravene i fredingstida i 30 (20) år, frå første gravlegging.

Når festetida er ute, kan gravstaden bli festa for nye 5 år. Når det er gått 60 år etter siste gravlegging, kan festet ikkje bli fornya utan etter særleg samtykkje frå gravplassforvaltninga.

I god tid før festetida er ute skal festaren bli varsla. Er ikkje festet blitt fornya innan seks månader etter forfall, fell grava eller gravstaden tilbake til gravplassen.

Innbetalt festeavgift blir berre betalt tilbake dersom tilbakebetaling følgjer av bindande rettsregler eller det ligg føre særlege grunnar.

Ingen kan bli gravlagt i festa gravstad utan festaren sitt samtykkje. Dersom det ikkje er råd å hente inn samtykkje frå den ansvarlege eller festaren til bruk av festa grav, kan gravplassforvaltinga ta avgjersle om gravlegging.

Festar pliktar å melde adresseendring.

§ 7. GRAV OG GRAVMINNE

Ved opning av grav kan jord bli lagt på omkringliggande graver og gravutstyr kan mellombels bli flytta. Gravplassforvaltinga sørgjer for istandsetting igjen, og vil også sjå til at grava blir tilsådd med gras etter gravlegging. Montering av gravminne kan først skje etter at gravplassforvaltinga har godkjent gravminnet og merka staden der det skal stå. Det kan ikkje bli sett opp tidlegare enn 6 månader etter gravlegging av kiste. Gravminne på urnegrav kan bli sett opp med ein gong etter urnenedsetting. Så lenge ein ventar på gravminne sørgjer gravplassforvaltinga for eit merke med avdøde sitt namn på.

På nyfesta gravstad skal gravminnet plasserast i bakkant av den grava som er tatt i bruk, og blir sentrert på gravstaden etter neste gravlegging.

§ 8. PLANTEFELT

Framfor gravminnet er det høve til å opparbeide eit plantefelt i høgde med bakken omkring. Det må ikkje vere breiare enn gravminnet si breidde, men kan i alle tilfelle vere opp til 60 cm breitt. Det kan ikkje stikke lengre fram enn 60 cm, målt frå gravminnet sin bakkant. Det kan ikkje plantast vekstar som overstig gravminnet si høgde eller går utover plantefeltet. Det er ikkje høve til å bruke faste dekorgjenstandar som blomsterurner, lykter mv. i plantefeltet. Det er høve til å tenne lys og oljelampe på grava, så lenge dette er innanfor gjeldande reglar om brannvern. Lys, oljelamper og andre lause dekorgjenstandar skal fjernast etter bruk.

Det er høve til å ramme inn plantefelt med delt steinkant eller bedplate som fluktar med terrenget omkring. Bedplate og fundament for gravminne skal ikkje henge saman.

Dersom det ikkje er aktuelt å ha plantefelt, skal det vere grasbakke på alle sider av gravminnet.

Det er ikkje høve til å ramme inn grava med hekk eller døde materiale.

§ 9. PLANTEMATERIALE

Planter, kransar og liknande materiale som blir nytta ved gravferd eller ved pynting av grav og som endar som avfall, skal fullt ut vere kompostérbare.

§ 10. STELL AV GRAV

Kvar ansvarleg for frigrav eller gravfestar har rett og plikt til å stelle den grava vedkomande har ansvaret for. Plantefelt som ikkje blir tilplanta eller stelt skal såast til av den ansvarlege eller bli sådd til av gravplassforvaltinga.

Ansvarleg for grav eller festar kan gjere avtale om at kyrkjeleg fellesråd eller den som får løyve til det etter § 13, kan utføre planting og stell av grav (samt montering, sikring og vedlikehald av gravminnet). Ein slik avtale fritenk ikkje den ansvarlege eller festar frå det ansvaret dei har etter reglane som til ei kvar tid gjeld.

§ 11. NAMNA MINNELUND

Ved gravlegging i namna minnelund skal namn og data til avdøde førast på ei namneplate på felles minnesmerke.

Ved gravlegging i namna minnelund må det betalast for kostnader til namneplate og del av minnesmerke, tilplanting og stell.

Gravplassforvaltinga har ansvaret for felles tilplanting og stell i minnelunden. Det er ikkje høve til å opparbeide eige plantefelt for grav i minnelund. Det kan leggst ned blomar og tennast gravlys så lenge dette er innanfor gjeldande reglar om brannvern, på ein stad tilvist av gravplassforvaltinga.

(§ 11 blir gjeldande når det blir etablert namna minnelundar på Osterøy)

§ 12. BÅREROM

Bårerom blir disponert av kyrkjelege fellesråd, og skal berre nyttast til oppbevaring av døde i tida fram til gravferda. Ingen har tilgang utan etter løyve.

§ 13. NÆRINGSVERKSEMD

Næringsdrivande som ønskjer å drive verksemd på gravplassen skal hente inn løyve frå gravplassforvaltinga. Løyvet kan kallast tilbake dersom vedkomande ikkje rettar seg etter dei reglane som gjeld.

Slik verksemd kan berre omfatte montering, sikring og vedlikehald av gravminne og tilplanting og stell av graver.

§ 14. ARBEID PÅ GRAVPLASSANE


Anleggs- og vedlikehaldsarbeid skal skje på kvardagar i arbeidstida (kl. 07:00-17:00) og må ikkje utførast på søndagar, heilagdagane eller offentlege høgtidsdagane. Ikkje noko arbeid på gravplassen må vere til sjanse for seremoniar eller rituelle handlingar på gravplass eller i bygning på gravplass. Næringsdrivande kan berre køyre på gravplassen i den grad det er nødvendig for å utføre arbeidet. Slik køyring skal skje ekstra omsynsfullt.

§ 15. DISPENSASJON FRÅ VEDTEKTENE

Gravplassforvaltinga kan i særlege tilfelle og innanfor ramma av gravferdslov og gjeldande forskrifter fråvike §§ 5 og 6 i vedtektene.



Kyrkjegardsarbeidar opnar grav. Foto: EB



Gravminne etter gullgravar Andrew Olsen. Bruvik kyrkjegard.